

Remitido

Musiconan conhuntamente cu e asociacion pa musico di Aruba mester uni, pa nos por logra hopi

E trabao di un Musico ta un trabao hopi importante mundialmente como tambe na Aruba. Bo por imaginabo con mundo lo ta, si no tabata tin musica.

Of si tabata tin musica, pero ningun musico pa interpreta e cancionnan.

Sin kita nada for di e trabao di e discjockeynan, mester bisa cu mayoria biaha ta hopi mas dushi ora cu na un fiesta tin un banda live ta toca.

Pa Cultura di Aruba, musica y musiconan ta esencial, como tambe pa tur establecimiento cu ta depende riba entretenimento, manera Hotel, Casino, Restaurant y clubnan nocturno.

Aruba tin hopi musico, cu ta haciendo un tremendo trabao diariamente pa tur e lugarnan menciona.

Sinembargo tin diferente problema cu e musiconan ta experiencia.

Tin musico cu ta keha di e echo cu hopi biaha

musiconan di afó ta worde busca, pa haci un trabao cu un musico Arubiano por a haci. Un otro problema tambe ta cu ultimo añanan, establecimiento, Hotel y Clubnan ta busca diferente motibo pa baha prijs di e musiconan, mientras cu costo di bida ta sigui subi.

E lugarnan ta usa "smoesjenan" manera September 11, of "Cos ta slow" of otro Banda of Musico por haci e trabao, pa menos pago. Pa ta franco, tin biaha musiconan mes ta aporta na haci e situacion peor, en especial ora cu nan keda baha nan prijs como musico, djis pa haya e trabao.

Si esaki sigui asina, e prijsnan pa banda toca, of un musico presenta ta bira mucho abao, pa e trabao importante y hopi biaha dificil, cu e artista ta haci.

Esaki ta causa pues cu musiconan ta worde menos precia.

Un problema serio cu musiconan, cu ta biba solamente di musica, ta enfrente cune tambe ta, kico ta pasa despues cu su contrato na un lugar a caba y esaki no a worde renoba, pa ki motibo cu ta.

Tin biaha por ta falta di e musico mes, cu quizas no a haci su trabao bon, of cada biaha ta yega laat.

Sinembargo tin por ehempel hotelnan, cu ta haya e asina yama "repeat guests", cu ta bin un of dos biaha pa aña na e mesun hotel, pues e hotel cada tanto tempo ta cambia e banda cu ta toca eyan, apesar cu quizas e banda ta haci un bon trabao.

Mirando tur esaki, a yega ora pa lanta un asociacion di musico nobo, of percura pa e asociacion cu tin na e momentonan aki, cuminsa traha den un direccion, unda cu nos por logra hopi mas pa e musiconan cu tin.

A yega tempo pa nos

profesionaliza nos mes y regla asuntonan manera por ehempel, abogadoan cu ta traha specialmente pa musico, cu por intermedia den asuntonan manera ora cu un banda perde su contrato, of ta worde forza pa baha su prijs, mientras cu bato di bida ta sigui subi.

E asociacion aki mester percura di traha duro, pa trece un union fuerte entre tur e musiconan, trahando tambe cierto acuerdonan, pa percura cu ningun hende ta baha prijs bao di cierto grens, pa asina e trabao importante di e musico keda bon aprecia.

Ta hopi esencial tambe pa lanta un fondo, al estilo di un fondo di pensioen, unda cu tur musico ta aporta cu un suma chikito tur luna, quizas tambe cu ayudo di comercio of Gobierno, unda cu ora cu un banda cu ta biba solamente

di musica perde su contrato por ehempel, e lo por haya sosten for di e fondo aki pa cierto tempo, cu por yuda sikiera un parti di e tempo te ora cu e logra di haya un contrato nobo otro caminda. Tambe e fondo aki lo por yuda esnan cu tin hopi aña den musica y mester retira pa motibo di a yega un edad haltu y no por traha mas.

E articulo aki no ta traha pa critica ningun hende of asociacion.

E ta solamente pa vocifera preocupacion di musiconan di Aruba y pa stimula e musiconan conhuntamente cu e asociacion y esnan cu experticio den e area aki, pa nos cuminsa haci algo serio, pasobra nos tin e hendenan capaz di logra hopi pa cu esaki.

Un Musico preocupa.